

# Kreashon Kubrí Ku Kùp

Sumpiña a hinka, solo a kima. Nos a kana, nos a soda, nos a susha kurpa i awor bultonan di saku pretu a forma un seru den baki di pikòp. Di baina algun saku a keda intakto pa yega pikòp. Dor di e skernan por a mira kùp, bòter di diferente koló, saku di pan di plèstik ku ta desintegrá den solo, karton muhá, kaha di Marlboro, waya, kabuya ku drachi tur plamá fo'i otro, algun pida palu klabá na otro komí pa komehein, bleki tur marón di frusto. Aki aya por nota un angua kla a penetrá dor di e saku fragil pa anunsiá ku un blachi di tuna tambe wòrdu "kapturá."

E limonada friu a baha bon den e kalor. Nos a keda satesfecho. E kayanan unda nos a piki sushi awor a keda limpi.

Sumanesé mi tabata riba e mesun ruta. Kaya tabata ketu e djadumingu mainta ei. Nèt mi tabata admirá e bunitesa di un kaya sin kùp, e obra di nos propio mannan, ora mi bista a kai riba algu ku kasi mi no por a kere. E bista mahos ku mi a soda pa eliminá ayera tabat'ei atrobe awe. Ata un kùp muhá bentá aki i un bòter berdè di Heineken bentá aya riba e trayekto unda mi mes a piki sushi ayera.

Algun ora despues tabatin mas trafiko riba kaya. E kabayero adulto i hoben den outo mi dilanti no tabatin purá i tabata kombersá trankil di nan. Nan lo a kaba di kome un pida pan òf bebe un jus pasobra diripiente nan a zuai un proyektil, un saku di papel maron, for di e bentana habrí di e outo den direkshon di asera. Inmediatamente nan kombersashon a wòrdu interumpí pa bashamentu di pito for di e outo nan tras. E hoben a bula, wak patras, i a haña un mensahe kla ku ei no ta lugá pa deshasí di e saku.

Den pasado frekuentemente turistanan a remarká kon limpi nos isla ta. Ma no mas. Alkontrario, ora nan ta regresá pa un segundo bishita nan ta keda desepshoná pa e oumento di sushidat. Ora su mahestat lareina Beatrix tabata di bishita, e tambe a opservá ku nos isla tabata mas limpi den pasado. Mondí a para bira lantfel. Hende ignorante ta deshasí di outo, frishidèr i stof bieu den mondi òf kantu di kamina.

Ultimo aña porfin algun organisashon a pone man na obra. Komishon Tene Boneiru Limpi a lansa un kampaña pa hasi nos isla limpi anto manten'é limpi. Awor nos ta informá bes tras bes, na varios manera, ku nos ta responsabel pa tene nos isla limpi: via radio, korant, stèmpel riba karta. Bòrchinan situá na varios sitio ta kòrdá nos pa hasi nos parti. Charlanan i kontèst di pikimentu di sushi ta eduká e alumnonan na skol. I asta turistanan ta duna un man.

Tur esaki ta fantastiko! Nos muchanan awor ta konsiente ku nan mester tene nos isla limpi. Nos turistanan tambe ta hasi mas ku nan parti. Ma kiko di nos mes...nos ku ta hoben i adulto? Maske nos ta tende i mira e propaganda, hopi biaha nos no ta hasi kaso. Ma no ta mucha ku ta benta tur e bòternan berdè di serbes na kantu di kamina di Playa pa Rincon. Ta mas parti nos ku ta hoben i adulto ku tin e mentalidat "unda e contenido di mi bòter ta kaba, t'ei mi ta benta e bòter." Ta nos ku mester *duna* un bon ehempel pa nos yunan, ku mester *sigui* nan bon ehempel.

Ora Dios a krea hende, El a pon'é den hòfi di Eden pa "kultivá i kuida e hòfi" (Genesis 2:15). Esei ainda mester ta nos aktitut. Nos mester kuida Dios Su kreashon na nos isla; no abusá di dje i destrui'é ku nos aktitut irresponsabel.

Nos no ta doño di e pida baranka riba kua nos ta biba. Beibel ta bisa, "Tera ta di Señor, i tur loke e ta kontené. Laman ta di djE, pasobra E ta Esun ku a trah'é; Su mannan a forma e tera seku" (Salmo 24:1; 95:5). Dios a krea mundu i tur e bunitesa di naturalesa ku nos por mira rònt di nos diariamente. Siendo Kreador, t'E--no nos--ta Doño. Loke El a krea ta bon. Ta kon nos por ta asina tribí pa kubri Su kreashon ku kùp?